

De Guate Hècks

A vòrt, en a kloa's ont versteckts dorf van Trentin, hòn galept lait as nea' aus en dorf gòngen sai'. Nea'met hòt gabisst abia as ist de bèlt iber de sèll grenz. Ma s hòt gahòt a diarn, as kennt hòt ont tsechen hòt mear as an iats ònders mensch.

En sèll dorf òlla hòn se guat kennt ont hòt se mitgaholven. Òll sunta ist an kirchta gaben, no de mess de lait hòn se augahòltn za klòffen, za èssn siaserain kocht van baiber, ont za tòzn ont lisnen de musik van gaing.

S dorf ist schea' gaben ont groas, de haiser òlla schea' nai gamòcht pet stoa' ont holz, ober s hòt nicht gahòt dort, koa' tscheftn ont koa' birtshaiser. Nea'met hòt gabisst bos as gèlt ist, bavai nea'met hòt s en birkle praucht. Nea'met hòt kummer gahòt va nicht, s ist ganua gaben schaung aus en bòlket ver za vergèssn òlls: lauter bisn links ont rèchts, as kemmen bòlt keing en spitz van pèrng. De eabech rua van sèll plòtz ist storzt gaben lai van lèrm van bòsser van tol ont van singen van veigl.

S hòt gahòt a ding as nèt klòr ist gaben, a ding as nea'met genau gabisst hòt ont as bos nea'met hòt gabellt klòffen. De kinder hòn vil vòrt pfrokt en de eltern za bissn abia as ist, ober de hòn en òlbe strittn ont tsòkt za vergèssn òlls ont vrong nea'mer nicht iber sèll. Òlla sai' nèt guat gaben za schbaing ont alura hòt s umanònder gahòt a tschatschera, ober men hòt nèt gabisst benn s bor ist oder nèt. Gabis ist gaben as ber as en za vil de nos drinn galeik hòt, hòt men nea'mer tsechen. Men hòt tsòkt as kan kloa' sea as en bipfl van heacheste pèrg ist, hòt s gahòt a holzena hitt bo as galept hòt an òlta hècks. Schiach ont znicht, as lai za schaung de hòt se de gamòcht verschbintn.

S Rosirl ist gaben a diarndl abia vil òndera van dorf. Sai' lem ist gaben semm zbischn de kamaròtn, de òrbet en haus, de kuchl ont de tanz en de haiser. De ist gaben simpatesch ont schea', ont bo se u'pfònt hòt za tòzn ist se gaben abia a kinegen. Tschai ont bundere, hòt se gamiast òlbe òlls bissn, de hòt nèt gamocht lem pet a vrog. En de leisten zaitn òber hòt se gaheart eppas naies ont de hòt s en nea'met tsòkt. De hòt gabellt vort gea' va semm, sèll

dorf ist nea'mer ganua gaben ver si.

An to, bail se gaben ist as en solder van haus za leing aus s zaig za tricknen, ist en en kopf kemmen s gschicht va de hècks kan sea. En sèll mòment hòt se tsbunnen bia sou as nea'met as se kennt hòt ist gòngen en sèll plòtz.

"Ist de tschatschera va de hècks bor gaben? Bavai nea'met hòt birkle de boret gabisst?" hòt se se pfrokt. De hòt gabisst as de hitt ist gaben, ober de hòt nèt verstònnen bia sou nea'met ist semm gòngen bes nèt bavai s hòt nèt gahòt a begl as semm pfiart hòt.

Bia e tsòkt hòn s Rosirl ist nèt tumm gaben ont hòt tsbunnen "Bia tuat s a normals mensch za lem doum en sèll plòtz? S ist nèt moglech! Bos trinkt s? Bos èsst s? Velaicht ist bor as s a hècks ist?"

De hòt nèt vrong gabelt en sai'na eltern de omport en doin vrogn, sistn hattn se en strittn.

Durch de nòcht hòt se nicht tschloven, de hòt òlbe tsbunnen en sèll plòtz. En de vria alura ist se austònnen, hòt ganòmmen der schnèrver ont ist vort a'ne song eppas. Ver za lònge se nèt sechen van sai'na eltern hòt se nanket tschelvert. No a por stunnen as en be, ist se nou nèt arivart gaben, ont hòt nanket gabisst bou se ist genau. Avarleist va lauter gea' hòt se se gamiast auhòlten za ròstn. S hòt gahòtt an larch as pariart hòt a kadreig: der viel schnea as en binter semm kimm, hòt en puckt gahòtt ont asou der stòmm van larch hòt pariart a dèstera kadreig. S Rosirl hòt se tsetzt ont hòt gèssen ont trunken òlls sèll as en schnèrver gahòtt hòt. Bo se veite ist gaben ont parootet za gea' bider vort, hòt se kein "Ist der doi larch birkle van schnea puckt kemmen oder ist an zoach va de hècks za mòchen me nèt umkearn?"

En sèll moment hòt se gabelt bider hoa'm gea', de vorcht ist òlbe greaser kemmen. Alura ist se austònnen, hòt der schnèrver ganòmmen ont hòt se gadra't za kearn um. No za hòn gamòcht zboa' tritt hòt se se schubet augahòlten. Bos ist tschechen, bart er enk vrong. De hòt se augahòlten bavai de hòt gaheart an stònk va rach.

De hòt se keart ont hòt tschmeckt bider pet de nos za sai' gabis "Jo, dos ist der tschmòch van an kami'. De hitt va de hècks mias nèt vèrr sai' va do. Bart s dos aa sai' an zoach va de hècks? Iatz mu e nea'mer umkearn, i mias envire gea'".

Alura s Rosirl ist envire gòngen no en tschmòch van rach. A bea'ne derno ist se arivart as de grenz van bòlt, semm hòt se se kniak hinter a tschippel ont pet de hònt hòt se puckt an òst za schaug benn se de hitt secht. Der plick ist unglablech gaben: en himmel hòt s lai bolken gahòt, ober drau en sea ont en de hitt ist gahoater gaben. Van an loch en de bolken de sunn hòt derèckt de hitt galiachtet, ont s pilt hòt se spiaglt en bösser van sea, s hòt pariert an letrat.

Za sechen der sèll schea'n plick s Rosirl hòt ver an moment vergèssn de vorcht ver en sèll plòtz, òlla de tschatschere as se gaheart hòt gahòt hòn en pariert nèt bor. Der sai' nono a vòrt hòt en kein gahòt "Denk mai' liaber Rosirl: sai' bea'ne de lait as tschbinnen ont prauchen der kopf, ober sai' vil de sèlln as klòffen". Velaicht òlla hòn tschmacht va de hècks ober nea'met hòt birckle gabisst bes a guats oder a znichtas mensch ist gaben. En sèll moment hòt se u'pfònt za laven gahassee ont hòt nèt au gaheart pis as se gaben ist as de tir van haus. Pet en hèrz en hòls hòt se mia tu' za otnen. Dòra hòt se dena tècklt en de tir.

No a por sekunden hòt se gaheart der lèrm van pfias as en pourn va holz ont a bea'ne derno an òlts ont kloa's baibl hòt autu' de tir. Peada hòn se u'tschaut: de òlt hòt gahòt lònigs ont baises hor, pet a lai vòrbeges tiachl, a ploba bollena maia, an lònigen schbòrzn tschònt ont a greas virta drau. Van baibl hòt men tsechen lai s tschicht: òlt, pet barzler ont a bea'ne baisen port unten en barbòz. S Rosirl envenze hòt u'gahòt a gels plischl pet a roats tschantl, ont sai' tschicht ist gaben sias abia a reasl.

De hècks hòt kein "Kimm arinn liaber kind, biar trinken an bòrmen tè, vorcht der nèt". S Rosirl hòt pfolkt en baibl ont ist aninn gòngen en haus ont hòt sperrt de tir. Bider de hècks hòt en pfrok "Bo billst en trinken der tè? Kan meir? Oder as en Hymalaya? Oder hòst liaber an kaffè en Sud America?" De sèll vrog hòt koa' sinn gahòt ver en Rosirl ont a'ne tschbinnen hòt se omport gem "I hòn nea' tsechen s meir".

S baibl hòt pahenn de hent tschlong ont en an moment s Rosirl hòt se pfuntn as a goltena spiaggia pet a bikera kòltn tè. A bea'ne derschrekt ont a bea'ne gabundert ist se austònnen ont ist gòngen pet de schink en bösser van meir: s ist gaben asou groas, asou schea', an sèllan schea'n lèrm. Va lauter vroa

hòt se u'pfònt za rearn.

An mònn as semm verpai ist hòt sa tsechen rearn ont hòt se augahòlten za vrong en bos as ist tschechen gaben, ber as se gaben ist ont va bo as se kemmen ist, ont asouna hòt se u'pfònt za kòntarn, aa bes en vir ist kemmen za sai' nòrret.

De zait ist verpai, de sunn ist noch gaben za gea' hintn ont de sa'i nou semm gaben za klòffen ont lòchen. Bail se semm ist gaben ist se kemmen za bissen as der sai' nai' kamaròtt a vort hòt galept en glaiche dorf.

“A to pin e prope stuf gaben za lem semm, s hòt za vil rua gahòt. Alura pin i gòngen za suachen de hitt kan sea, as nea'met gabisst hòt bos as e drinn hòt. Van sèll to pin e òlbe nou do.”

S Rosirl alura hòt en pfrok: “Nea'met boast as i do pin, bia tua e za song s en de mai mama? Mu' e nèt zaruck gea' hoa'm?”

Der mònn hòt en omport gem “Jo vraila, men du de ang sperrst ont birckle billst hoa'm gea', de hècks mòcht de bider hoa'm gea'”.

S Rosirl hòt padònt der mònn, de hòt en verhoast as de baret bider gòngen za vinnen en ont an moment derno ist se bider gaben en haus kan baibl. Schubet de hècks hòt en pfrok bavai ist se bider semm gaben. De jung diarn hòt en kein as si hòt nèt gabellt vliachen van sai' dorf, de hòt lai gabellt bissn de boret bavai òlla en dorf hòt se pforchtn van sèll plòtz. De hècks hòt se tsetzt as en pankl ont hòt en tsòk “De lait verchtn se vavai de bissn nèt. Vour za verchtn se oder za schmachen, de boret mias men sa suachen. Iaz geahi' lai hoa'm men der billst, ober denkt der as men der eppas sogst de lait barn tsbinnen as der pist nòrret. Ober du iaz boast de boret. Denk der der vrait as du gahòt hòt hait, denk der bia schea' as ist de bèlt aus en dai' dorf. Nimm der òlbe mit sèll as der galeart hòt hait ont der barst greaser abia de òndern sai'”.

S Rosirl ist vrea gaben ont hòt pfrok nou en de hècks vour za gea' “Mu' e nou kemmen ver za gea' za vinnen der mònn van meir?”

De hècks hòt kein “Benn as der billst. Du kimmst ka miar ont i bar der zoang de gònze bèlt.”

Van sèll to de diarn ist gòngen òll boch za vinnen de hècks, as en zoakt hòt a bea'ne as de vort de schea'nesten plazt va de bèlt. S Rosirl ist asou vrea

gaben, òll ònder vort ist se vrearer gaben, de hòt se gaheart a kinegen. Ober bos veite ist gaben an iatn roas, hòt se òlbe hoa'm gabellt gea', ont trong se mit sèll as e galeart hòt en sai' dorf.

De hècks ist nèt gaben òlt ont schiach, men hòt sa tsechen abia as men sa tsbunnen hòt. Bes oa's hòt se pforchtn semm hòt er sa tsechen òlt ont schiach, ber as a gearn hòt gahòt envenze hòt sa tsechen schea' jung ont quat.